

*Dio non ha creato frontiere ...
Il mio obiettivo
è l'amicizia con il mondo intero*
M. Gandi

San Denêl, 1 di Avost dal 1978

Ciâr Pre Antoni,

i scrîf a lui a non dal grup dai Maestris Catolics furlans che an organizât, pa fin di avost, un incuintri su la mont di Prât, parsore di Forcjarije sul tema da lenghe, culture furlane tas scuelis. Io i vares di domandai se ancje lui al podares danus une man; io i fasares ve qualchi test di prose e poesie, scrit in furlan pai frus e lui, come scritôr e come maestri, al vares di dâ une cjalade ai libris e di esprimi la so opinion su chel ch'al à let. Ce ch'a si cîr vue al è podê fâ un discors ai nestris frus ch'a nol sei superficial e nol servissi a nuie, ma ch'a si lei ai discors pui grancj di scuvierde di valors e di afiet pal nestri tormentât popul furlan.

Ciâr pre Antoni, i vares bisugne di savê subit se al pues vignî a danus une man, se la rispueste a è sî, alore i fasares vê, o par pueste o fasint un salt lassù di lui (sa mi dîs quant ch'ai è a cjase) i libris ch'al vares di cjalâ.

E magari i quartares cun me me mari (sâl cui ch'a è me mari? A è Marie, la gnece di Siôr Santul, che lui al a, in maniere cussì umane e cjare, ricuardât tal so libri! Lu vin lèt cun tant plasè! E grassie di dut ce ch'al fâs pal Friûl, pre Antoni!

Sperant ta so colaborasion, lu ringrassi tant e i lassi sot il mio indiric (no ai il telefono) cussi mi po rispuindi subit.

Mandi

Renata Micoli

.....
.....

La sornade ch'al vares di vignî sul Mont di Prât a è: màrtas 29 di avost, possibilmentri, e sa nol po, ancje miercui 30 di Avost.

Ch'al mi scusi s'al cjate qualchi sbaglio ma i crôt ch'a nol sei chel il problema, l'impuartant al è capissi e vê la volontât di fâ e di lâ indenant!

PLÊF DI S. MARTIN VESCU
 RUALP E VAL
 33022 CJARGNE

ai tre di Avost dal 1978

Siore Maestre riveride,

o ài cjapade la so letare e mi à plasût tant, ma tant che no j sai a dî. Migo par nuie ve', ma parceche fint ore i mestris catolics a erin tant di Diu catolics che puar mai lui chel che ur diseve che a erin ancje mestris furlans, di canais furlans, tun popul cuntune muse e une ghigne ben definide. E dut par chê pice osteade di sei catolics tal sens piês de peraule, vadi dut e nuie.

Dacjâf de so letare e je une massime (un dèt) di Gandi: *"Dio non ha creato frontiere ... Il mio obiettivo è l'amicizia con il mondo intero"*. Veretât sacrosante! E o varessin di vê frontieris e confins cul nestri popul? Di jessi in rotis cu la nestre int par sei in amicizie cun chêi dal Katanga? Mi plâs ancje chel toc di vanzeli che al dîs: "No steit a cjapâ la strade dai pagans (vadi i forescj) e no steit a jentrâ tune sitât di samaritans (a erin eretics e in rotis), ma LAIT A CIRI LIS PIORIS PIERDUDIS DE FAMEE D'ISDRAEL (Matjeu 10,5-6).

E j sameie pôc? Cence dâj tuart a Gandi, anzit par sei cun Gandi che al tignive prin di dut pal so popul, o stoi cun Gjesù Crist, che nol veve dome religjon ma ancje pedagogjie e psicologjie e sintiment di vendi.

A riguart di ce che mi domande, j rispuindarai cuntun si e cuntun no.

Sa'al è di vignî jù la jù, no ven. Mi àn tajade mieze panze par vie di un infart intestinâl e o soi ancjemò sotsore e no pues mateâ nè cun viaçs ne cun cunvignis. E po o cavilarês cui mastris masse catolics. Però riguart a dâi une man o soi pluî che disponût. Se mai j pues preparâi un scrit, un alc, che daspò jê a po doprâlu cemût ch'a crôt.

Alore, se ûl vignî sù, o varès gust fâ une babade insieme. Dopo jê mi lasse i scrits che m'aj studii; j prepari la relazion e j mandi jù dut midiant di pre Roman capelan di S. Denêl o a mieç di cualchidun âtri. Se ûl vignî sù, mi cjate tant di sabide dopomisdî, tôr cinc (cussì e pò fermâsi a cjoli alc di cene) o joibe (doman vot). Senò e pò dâmi un colp di telefon al (0433-92...), des vot di sere fintramai vot a biunore (lu ài dapît dal jet e no mi disturbe, parcè che fin miezegnot o lei e o scîf).

O ai gust che so mari e seti la gnece di Siôr Santul e che il libri i veti plasût, parcè che mi àn tant slengonât, massime i predessàz, che ju varès sbilfâts. Jò Siôr Santul, daûr che mi àn contât la int, lu ai viodût cussì e no crôt di vêi mancjât di rispjet un ostie nuie.

Par finî, le saludi cuntant afiet, jê e so mari, e che ciri di sei une mestre furlane e cussient: cussì e sarà ancje una mestre catoliche, magari cence tessare come me. Mandi

Antoni Beline